

司馬遷

仁本第一

古者以仁為本以義治之之謂正正不獲意則權權出于戰不出于中人是故殺人安人殺之可也攻其國愛其民攻之可也以戰止戰雖戰可也故仁見親義見說智見恃勇見方信見信內得愛焉所以守也外得威焉所以戰也戰道不違時不歷民病所以愛吾民也不加喪不因凶所以愛乎其民也冬夏不興師所以兼愛民也故國雖大好戰必亡天下雖安忘戰必危天下既平天子大愷春蒐秋獮諸侯春振旅秋治兵所以不忘戰也古者逐奔不過百步縱綏不過三舍是以明其禮也不窮不能而哀憐傷病是以明其仁也成列而鼓是以明其信也爭義不爭利是以明其義也又能舍服是以明其勇也知終知始是以明其智也六德以時合教以為民紀之道也自古之政也先王之治順天之道設地之宜官民之德而正名治物立國辨職以爵分祿諸侯說懷海外來服獄弭而兵寢聖德之治也其次賢王制禮樂法度乃作五刑與甲兵以討不義巡狩省方會諸侯考不同其有失命亂常背德逆天之時而危有功之君徧告于諸侯彰明有罪乃告于皇天上帝日月星辰禱于后土四海神祇山川塚社乃造于先王然後冢宰徵師于諸侯曰某國為不道征之以某年月日師至于某國會天子正刑冢宰與百官布令于軍曰入罪人之地無暴神祇無行田臘無毀土功無燔牆屋無伐林木無取六畜禾黍器械見其老幼奉歸勿傷雖遇壯者不校勿敵敵若傷之醫藥歸之既誅有罪王及諸侯修正

其國舉賢立明正復厥職王霸之所以治諸侯者六以土地形諸侯以政令平諸侯以禮信親諸侯以材力說諸侯以謀人維諸侯以兵革服諸侯同患同利以合諸侯比小事大以和諸侯會之以發禁者九憑弱犯寡則晉之賊賢害民則伐之暴內陵外則壇之野荒民散則削之負固不服則侵之賊殺其親則正之放弑其君則殘之犯令陵政則杜之外內亂禽獸行則滅之

天子之義第二

天子之義必純取法天地而觀于先聖士庶之義必奉于父母而正于君長故雖有明君士不先教不可用也古之教民必立貴賤之倫經使不相陵德義不相踰材技不相掩勇力不相犯故力同而意和也古者國容不入軍軍容不入國故德義不相踰上貴不伐之士不伐之六上之器也苟不伐則無求無求則不爭國中之聽必得其情軍旅之聽必得其宜故材技不相掩從命為士上賞犯命為士上戮故勇力不相犯既致教其民然後謹選而使之事極修則百官給矣教極省則民興良矣習貫成則民體俗矣教化之至也古者遂奔不遠縱綏不及不遠則難誘不及則難陷以禮為固以仁為勝既勝之後其教可復是以君子貴之也有虞氏戒于國中欲民體其命也夏后氏誓于軍中欲民先成其慮也殷誓于軍門之外欲民先意以待事也周將交刃而誓之以致民志也夏后氏正其德也未用兵之刀故其兵不雜殷義也始用兵之刀矣周力也盡用兵之刀矣夏賞于朝貴善也殷戮于市威不善也周賞于朝戮于市勸君子懼小人也三王彰其德一也兵不雜則不利長兵以衛短兵以守太長則難犯太短則不及太

輕則銳銳則易亂太重則鈍鈍則不濟戎車夏后氏曰鈞車先正也殷曰寅車先疾也周曰元戎先良也旂夏后氏玄首人之執也殷曰天之義也周黃地之道也章夏后氏以日月尚明也殷以虎尚威也周以龍尚文也師多務威則民誅少威則民不勝上使民不得其義百姓不得其叙技用不得其利牛馬不得其任有司陵之此謂多威多威則民誅上不尊德而任詐慝不尊道而任暴力不貴用命而貴犯命不貴善行而貴暴行陵之有司此謂少威少威則民不勝軍旅少舒為主舒則民力足雖交兵致刃徒不趨車不馳逐奔不踰列是以不亂軍旅之固不失行列之政不絕人馬之力遲速不過誠命古者國容不入軍軍容不入國軍容入國則民德廢國容入軍則民德弱故在國言文而語溫在朝恭以遜修己以待人不召不至不問不言難進易退在軍抗而立行在行遂而果介者不拜兵車不式城上不趨危事不虛故禮與法表裏也文與武左右也古者賢王明民之德盡民之善故無廢德無簡民賞無所生罰無所試有虞氏不賞不罰而民可用至德也夏賞而不罰至教也殷罰而不賞至威也周以賞罰德衰也賞不踰時欲民速得為善之利也罰不違列欲民速親為不善之害也大捷不賞上下皆不伐善上苟不伐善則不驕矣下苟不伐善必亡等矣上下不伐善若此讓之至也大敗不誅上下皆以不善在己上苟以不善在己必悔其過下苟以不善在己必遠其罪上下分惡若此讓之至也古者戍軍三年不興觀民之勞也上下相報若此和之至也得意則愷歌示喜也偃伯靈臺答民之勞示休也

定爵第二

凡戰定爵位著功罪收遊士申教詔訊厥衆求厥技方慮極物變嫌推疑養力索巧因心之動
凡戰固衆相利治亂進止服正成恥約法省罰小罪乃殺小罪勝大罪因順天阜財懾衆利地
右兵是謂五慮順天奉時阜財因敵懾衆勉若利地守隘險阻右兵弓矢禦及矛守戈戟助凡
五兵五當長以銜短短以救長迭戰則久皆戰則強見物與侔是謂兩之主固勉若視敵而舉
將心心也衆心心也馬牛車兵佚飽力也教惟豫戰惟節將軍身也卒支也伍指拇也凡戰權
也鬪勇也陳巧也用其所欲行其所能廢其不欲不能于敵反是凡戰有天有財有善時日不
遷龜勝微行是謂有天衆有有因生美是謂有財人習陳利極物以豫是謂有善人勉及任是
謂樂人大軍以固多力以煩堪物簡治見物應卒是謂行豫輕車輕徒弓矢固禦是謂大軍密
靜多內力是謂固陳因是進退是謂多力上暇人教是謂煩陳然有以職是謂堪物因是辨物
是謂簡治稱衆因地因敵令陳攻戰守進退止前後序車徒因是謂戰參不服不信不和怠疑
獸懼枝拄詘頰肆崩緩是謂戰患驕驕憚憚吟嘯虞懼事悔是謂毀折大小堅柔參伍衆寡凡
兩是謂戰權凡戰間達觀邇因時因財賞信惡疑作兵義作事時使人患見敵靜見亂暇見危
難無忘其衆居國惠以信在軍廣以武刃上果以敏居國和在軍法刃上察居國見好在軍見
方刃上見信凡陳行惟疏戰惟密兵惟雜人教厚靜乃治威利章相守義則人勉慮多成則人
服時中服厥次治物既章目乃明慮既定心乃強進退無疑見敵無謀聽誅無誑其名無變其

旗。凡事善則長。因古則行。誓作章。人乃強。滅厲祥滅厲之道。一曰義。被之以信。臨之以強。成基。一天下之形。人莫不說。是謂兼用其人。一曰權。成其溢。奪其好。我自其外。使自其內。一曰人。二曰王。三曰辭。四曰巧。五曰火。六曰水。七曰兵。是謂七政。榮利恥死。是謂四守。容色積威。不過改。意。凡此道也。唯仁有親。有仁無信。反敗厥身。人人正。正解辭。火。火。凡戰之道。既作其氣。因發其。政。假之以色。道之以辭。因懼而戒。因欲而事。蹈敵制地。以職命之。是謂戰法。凡人之形。由衆之。求試以名行。必善行之。若行不行。身以將之。若行而行。因使勿忘。三乃成章。人生之宜謂之法。凡治亂之道。一曰仁。二曰信。三曰直。四曰一。五曰義。六曰變。七曰專。立法。一曰受。二曰法。三曰立。四曰疾。五曰御其服。六曰等其色。七曰百官宜無淫服。凡軍使法在己曰專。與下畏法曰法。軍無小聽。戰無小利。日成行微曰道。凡戰。正不行則事專。不服則法不相信則一。若急則動之。若疑則變之。若人。不信上。則行其不復。自古之政也。

嚴位第四

凡戰之道。位欲嚴。政欲栗。力欲窳。氣欲閑。心欲一。凡戰之道。等道義。立卒伍。定行列。正縱橫。察名實。立進俯。坐進跪。畏則密。危則坐。遠者視之。則不畏。邇者勿視。則不散。位下左右。下甲坐誓。徐行之。位速。徒甲。籌以輕重。振馬。謀徒甲。畏亦密之。跪坐坐伏。則膝行而寬。誓之。起。譟鼓而進。則以鐸止之。銜枚誓親。坐膝行而推之。執戮禁顧。譟以先之。若畏人甚。則勿戮。殺示以顏色。告之以所生。循省其職。凡三軍人戒。分日。人禁不息。不可以分食。方其疑惑。可師可服。凡戰。以力。

久以氣勝以固久以危勝本心固新氣勝以甲固以兵勝凡車以密固徒以坐固甲以重固兵以輕勝人有勝心惟敵之視人有畏心惟畏之視兩心交定兩利若一兩為之戰惟權視之凡戰以輕行輕則危以重行重則無功以輕行重則敗以重行輕則戰故戰相為輕重舍謹兵甲行慎行列戰謹進止凡戰敬則懾率則服上煩輕上暇重奏鼓輕舒鼓重服膚輕服美重凡馬車堅甲兵利輕乃重上同無獲上專多死上生多疑上死不勝凡人死愛死怒死威死義死利凡戰之道教約人輕死道約人死正凡戰若勝若否若天若人凡戰三軍之戒無過三日一卒之警無過分日一人之禁無過皆息凡大善用本其次用末執略守微本末唯權戰也凡勝三軍一人勝凡鼓鼓旌旗鼓車鼓馬鼓徒鼓兵鼓首鼓足七鼓兼齊凡戰既固勿重重進勿蓋凡進危凡戰非陳之難使人可陳難非使可陳難使人可用難非知之難行之難人方有性性州異教成俗俗州異道化俗凡象寡若勝若否兵不告利甲不告堅車不告固馬不告良眾不自多未獲道凡戰勝則與眾分善若將復戰則重賞罰若使不勝取過在己復戰則誓己居前無復先術勝否勿文是謂正則凡民以仁救以義戰以智決以勇鬪以信專以利勸以功勝故心中仁行中義堪物智也堪大勇也堪久信也讓以和人自洽自予以不循爭賢以為人說其心効其力凡戰擊其微靜避其強靜擊其倦勞避其閑窳擊其大懼避其小懼自古之政也

用眾第五

凡戰之道用寡固用眾治寡利煩眾利正用眾進止用寡進退眾以合寡則遠裏而闕之若分

而迭擊。寡以待衆。若衆疑之。則自用之。擅利則釋旗迎而反之。敵若衆。則相衆而受裹。敵若寡。若畏。則避之。開之。凡戰。背風背高。右高左險。歷沛歷圯。兼舍環龜。凡戰。設而觀其作。視敵而舉。待則循。而勿鼓。待衆之作。攻則屯而伺之。凡戰。衆寡以觀其變。進退以觀其固。危而觀其懼。靜而觀其怠。動而觀其疑。襲而觀其治。擊其疑。加其卒。致其屈。襲其規。因其不避。阻其圖。奪其慮。乘其懈。凡從奔勿息。敵人或止於路。則慮之。凡近敵都。必有進路。退必有反慮。凡戰。先則弊。後則懈。息則怠。不息亦弊。息久亦反其懈。書親絕。是謂絕。顧之慮。選良次兵。是謂益。人之強。棄任節食。是謂開人之意。自古之政也。

一六

四本

司馬遷終

尉繚子目錄

魏人鬼谷高弟因惠王聘陳兵法二十四篇

天官第一

兵談第二

制談第三

戰威第四

攻權第五

守權第六

十二陵第七

武議第八

將理第九

原官第十

治本第十一

戰權第十二

重刑令第十三

伍制令第十四

分塞令第十五

束伍令第十六

經卒令第十七

勤卒令第十八

將令第十九

踵軍令第二十

兵教上第二十一

兵教下第二十二

兵令上第二十三

兵令下第二十四

尉繚子卷上

天官第一

梁惠王問尉繚子曰黃帝刑德可以百勝有之子尉繚子對曰刑以伐之德以守之非所謂天官時日陰陽向背也黃帝者人事而已矣何者今有城東西攻不能取南北攻不能取四方豈無順時乘之者耶然不能取者城高池深兵器備具財穀多積豪士一謀者也若城下池淺守弱則取之矣由是觀之天官時日不若人事也按天官曰背水陣為絕地向阪陣為廢軍武王伐紂背濟水向山阪而陣以二萬二千五百人擊紂之億萬而滅商豈紂不得天官之陣哉楚將公子心與齊人戰時有彗星出柄在齊柄所在勝不可擊公子心曰彗星何知以彗鬪者固倒而勝焉明日與齊戰大破之黃帝曰先神先鬼先稽我智謂之天官人事而已

兵談第二

量土地肥磽而立邑建城稱地以城稱人。以人稱粟。三相稱則內可以固守。外可以戰勝。戰勝于外。備主于內。勝備相應。猶合符節。無異故也。治兵者。若祕于地。若邃于天。生於無。故開大不究。小不恢。明乎禁舍。開塞。民流者。親之地。不治者。任之。夫土廣而任。則國富。民眾而制。則國治。富治者。民不發軔。甲不出暴。而威制天下。故曰兵勝於朝廷。不暴甲而勝者。主勝也。陳而勝者。將勝也。兵起非可以忿也。見勝則興。不見勝則止。患在百里之內。不起一日之師。患在千里之內。不起一月之師。患在四海之內。不起一歲之師。將者。上不制於天下。下不制於地。中不制於

人寬不可激而怒。清不可事以財。夫心狂耳聾目盲。以三悖率人者。難矣。兵之所及。羊腸亦勝。鋸齒亦勝。緣山亦勝。入谷亦勝。方亦勝。圓亦勝。重者如山。如林。如江。如河。輕者如炮。如燭。如垣。壓之。如雲。覆之。令人聚不得以散。散不得以聚。左不得以右。右不得以左。兵如總木弩。如羊角。人人無不騰陵張騰。絕乎疑慮。堂堂法而去。

制談第三

凡兵制必先定。制先定則士不亂。士不亂則刑乃明。金鼓所指。則百人盡鬪。陷行亂陳。則千人盡鬪。覆軍殺將。則萬人齊刃。天下莫能當其戰矣。古者士有什伍。車有偏列。鼓鳴旗麾。先登者未嘗非多力國士也。先死者亦未嘗非多力國士也。損敵一人而損我百人。此資敵而傷我甚焉。世將不能禁。征役分軍而逃歸。或臨戰自北。則逃傷甚焉。世將不能禁。殺人於百步之外者。弓矢也。殺人於五十步之外者。矛戟也。將已鼓而士卒相罵。樹矢折矛拖戟。利後發。戰有此數者。內自敗也。世將不能禁。士失什伍。車失偏列。奇兵捐將而走。大眾亦走。世將不能禁。夫將能禁此四者。則高山陵之。深水絕之。堅陣犯之。不能禁此四者。猶亡舟楫絕江湖。不可得也。民非樂死而惡生也。號令明。法制審。故能使之前。明賞於前。決罰於後。是以發能中利。動則有功。令百人一卒。千人一司馬。萬人一將。以少誅眾。以弱誅強。試聽臣言。其術足使三軍之眾。誅一人無失刑。父不敢舍子。子不敢舍父。況國人乎。一夫仗劍擊於市。萬人無不避之者。臣謂非一人之獨勇。萬人皆不有也。何則。必死與必生固不侔也。聽臣之術。足使三軍之眾為一死賊。莫敢

當其前。莫敢隨其後。而能獨出獨入焉。獨出獨入者。王霸之兵也。有提十萬之眾。而天下莫當者。誰曰桓公也。有提七萬之眾。而天下莫當者。誰曰吳起也。有提三萬之眾。而天下莫當者。誰曰武子也。今天下諸國士。所率無不及二十萬之眾。然不能濟功名者。不明乎禁舍開塞也。明其制。一人勝之。則十人亦以勝之也。十人勝之。則百千萬人亦以勝之也。故曰便吾器用。養吾武勇。發之如鳥擊。如赴千仞之谿。今國被患者。以重幣出聘。以愛子出質。以地界出割。得天下助卒。名為十萬。其實不過數萬耳。其兵來者。無不謂其將曰。無為入下先戰。其實不可得而戰也。重吾境內之民。無伍莫能正矣。經制十萬之眾。而王必能使之衣吾衣。食吾食。戰不勝。守不固者。非吾民之罪。內自致也。天下諸國助我戰。猶良驥騄駼之駛。彼駑馬。警與角。遂何能紹吾氣哉。吾用天下之用。以為用。吾制天下之制。以為制。修吾號令。明吾賞罰。使天下非農無所得食。非戰無所得爵。使民揚臂爭出農戰。而天下無敵矣。故曰發號出令。信行國內。民言有可以勝敵者。毋許其空言。必試其能戰也。視人之地。而有之。分人之民。而畜之。必能內有其賢者。也不能內有其賢。而欲有天下。必覆軍殺將。如此雖戰勝。而國益弱。得地而國益貧。由中國之制。弊矣。

戰威第四

凡兵有以道勝。有以威勝。有以力勝。講武料敵。使敵之氣失。而師散。雖形全而不為之用。此道勝也。審法制。明賞罰。使器用。使民有必戰之心。此威勝也。破軍殺將。乘闖發機。潰眾奪地。成功

乃返此力勝也。王侯知此，所以三勝者畢矣。夫將之所以戰者，民也。民之所以戰者，氣也。氣實則鬪，氣奪則走。刑未加，兵未接，而所以奪敵者五也。一曰廟勝之論，二曰受命之論，三曰踰垠之論，四曰深溝高壘之論，五曰舉陳加刑之論。此五者，先料敵而後動，是以擊虛奪之也。善用兵者，能奪人而不奪于人，奪者心之機也。令者一眾心也，眾不審則數變，數變則令雖出眾不信矣。故令之之法，小過無更，小疑無中。故上無疑令，則眾不二聽，動無疑事，則眾不二志。未有不信其心，而能得其力者也。未有不得其力，而能致其死戰者也。故國必有禮信親愛之義，則可以饑易飽，國必有孝慈廉恥之俗，則可以死易生。古者率民必先禮信，而後爵祿，先廉恥而後刑罰，先親愛而後律其身。故戰者必本乎率身以勵眾士，如心之使四肢也，志不勵則士不死節，士不死節則眾不戰，勵士之道，民之生不可不厚也，爵列之等，死喪之親，民之所營不可不顯也，必也因民之所生而利之，因民之所營而顯之。田祿之實，飲食之親，鄉里相勸，死喪相救，兵役相從，此民之所勵也。使什伍如親戚，卒伯如朋友，止如堵牆，動如風雨，車不結轡，士不旋踵，此本戰之道也。地所以養民也，城所以守地也，戰所以守城也，故務耕者民不饑，務守者地不危，務戰者城不圍。三者先王之本務也。本務者兵最急，故先王專於兵有五焉。委積不多，則事不行，賞祿不厚，則民不勸，武事不選，則眾不强，備用不便，則力不壯，刑賞不中，則眾不畏。務此五者，靜能守其所固，動能成其所欲。夫以居攻出，則居欲重，陳欲堅，發欲畢，鬪欲齊。王國富民，霸國富士，僅存之國富大夫，亡國富倉府，所謂上滿下漏，患無所救。故曰舉賢任能，不時

日而事利明法審令。不下筮而獲吉。貴功養勞。不禱祠而得福。又曰天時不如地利。地利不如人和。聖人所貴。人事而已。夫勤勞之師。將必先已。暑不張蓋。寒不重衣。險必下步。軍井成而後飲。軍食熟而後飯。軍壘成而後舍。勞佚必以身同之。如此師雖久而不老不弊。

攻權第五

兵以靜勝國以專勝。力分者弱。心疑者背。夫力弱故進退不豪。縱敵不擒。將吏士卒動靜一身。心既疑背。則計決而不動。動決而不禁。異口虛言。將無修容。卒無常試。發攻必動。是謂疾陵之兵。無足與鬪。將帥者心也。羣下者支節也。其心動以誠。則支節必力。其心動以疑。則支節必背。夫將不心制。卒不節動。雖勝幸勝也。非攻權也。夫民無兩畏也。畏我侮敵。畏敵侮我。見侮者敗。立威者勝。凡將能其道者。吏畏其將也。吏畏其將者。民畏其吏也。民畏其吏者。敵畏其民也。是故知勝敗之道者。必先知畏侮之權。夫不愛悅其心者。不我用也。不威嚴其心者。不我舉也。愛在下順。威在上立。愛故不二。威故不犯。故善將者愛與威而已。戰不必勝。不可以言戰。攻不必拔。不可以言攻。不然刑罰不足信也。信在期前。事在未兆。故眾已聚。不虛散。兵已出。不徒歸。求敵若求亡子。擊敵若救溺人。分險者無戰心。挑戰者無全氣。鬪戰者無勝兵。凡挾義而戰者。貴從我起。爭私結怨。應不得已。怨結難起。待之責後。故爭必當待之。息必當備之。其有勝於朝廷。有勝於原野。有勝於市井。鬪則得服。則先幸以不敗。此不意彼驚懼而曲勝之也。曲勝言非全也。非全勝者無權名。故明主戰攻之日。合鼓合角。節以兵刃。不求勝而勝也。兵有去備。微威而

勝者以其有法故也。有器用之蚤定也。其應敵也。周其總率也。極故五人而伍。十人而什。百人而卒。千人而率。萬人而將。已周已極。其朝死則朝代。暮死則暮代。權敵審將而後舉兵。故凡集兵千里者。旬日。百里者一日。必集敵境。卒聚將至。深入其地。錯絕其道。棲其大城大邑。使之登城。逼危男女數重。各逼地形而攻要害。據一城邑而數道絕。從而攻之。敵將帥不能攻。吏卒不能和。刑有所不從者。則我敗之矣。敵救未至而一城已降。津梁未發。要塞未修。城險未設。渠谷未張。則雖有城無守矣。遠堡未入。戍客未歸。則雖有人無人矣。六畜未聚。五穀未收。財用未餽。則雖有資無資矣。夫城邑空虛而資盡者。我因其虛而攻之。法曰。獨出獨入。敵不接刃而致之。此之謂也。

守權第六

凡守者。進不郭圍退不亭障。以禦戰。非善者也。豪傑英俊。堅甲利兵。勁弩強矢。盡在郭中。乃收塞廩。毀折而入保。令客氣十倍。而主之氣不半焉。敵攻者傷之甚也。然而世將弗能知。夫守者不失其隙者也。守法。城一丈。十人守之。上食不與焉。出者不守。守者不出。一而當十。十而當百。百而當千。千而當萬。故為城郭者。非特費於民聚土壤也。誠為守也。千丈之城。則萬人之守。池深而廣。城堅而厚。士民備。薪食給。弩堅矢強。矛戟稱之。此守法也。攻者不下十餘萬之眾。其有必救之軍者。則有必守之城。無必救之軍者。則無必守之城。若彼城堅而救誠。則愚夫蠢婦。無不蔽城。盡資血。城者期年之城。守餘于攻者。救餘於守者。若彼城堅而救不誠。則愚夫蠢婦。

無不守陴而泣下。此人之常情也。遂發其窖廩救撫。則亦不能止矣。必鼓其豪傑英俊堅甲利兵。勁弩強矢。并於前。公磨毀瘠者。并於後。十萬之兵。頓於城下。救必開之。守必出之。出據要塞。但救其後。無絕其糧道。中外相應。此救而示之不誠。示之不誠。則倒敵而待之者也。後其壯前其老。彼敵無前。守不得而止矣。此守權之謂也。

十二陵第七

威在於不變。惠在於因時。機在於應事。戰在於治氣。攻在於意表。守在於外飾。無過在於度數。無困在於豫備。慎在於畏小。智在於治大。除害在於敢斷。得眾在於下人。悔在於任疑。孽在於屠戮。偏在於多私。不祥在於惡聞。已過不度在於竭民財。不明在於受間。不實在於輕發。固陋在於離賢。禍在於好利害。在於親小人。亡在於無所守。危在於無號令。

武議第八

凡兵不攻無過之城。不殺無罪之人。夫殺人之父。凡利人之貨財。臣妾人之子女。此皆盜也。故兵者所以誅暴亂。禁不義也。兵之所加者。農不離其田業。賈不離其肆宅。士大夫不離其官府。由其武議在於一人。故兵不血刃而天下親焉。萬乘農戰。千乘救守。百乘事養。農戰不外索權。救存不外索助。事養不外索資。夫出不足戰。入不足守者。治之以市。市者所以給戰守也。萬乘無千乘之助。必有百乘之市。凡誅者所以明武也。殺一人而三軍震者。殺一人而萬人喜者。殺之貴。大賞之貴小。當殺而雖貴重必殺之。是刑上究也。賞及牛童馬圉者。是賞下流。